

□ व्यंग्य

सवाल शुद्धता रौ

डॉ. भगवतीलाल व्यास

लेखक परिचै

डॉ. भगवतीलाल व्यास रौ जलम 1941 में होयौ। आप अम.अ., अम.अड. तक भण्योड़ा है। आप लारलै पांच दसकां सू राजस्थानी साहित्य री सेवा कर रैया है। आप राजस्थानी में पद्य अर गद्य दोन्युं विधा में लिखै। 'अणहद नाद', 'अगनी मंतर' अर 'सबद राग' आपरा चावा कविता-संग्रै है। कविता टाळ आप कहाणी अर व्यंग्य भी लिखै। आप राजस्थानी भासा, साहित्य एवं संस्कृति अकादमी, बीकानेर री मासिक पत्रिका 'जागती जोत' रौ केई बरस संपादन ई कर्यौ। आपनै के. के. बिड़ला फाउंडेशन कानी सू 'बिहारी पुरस्कार', साहित्य अकादमी, दिल्ली कानी सू 'राजस्थानी पुरस्कार', महाराणा मेवाड़ फाउंडेशन, उदयपुर कानी सू 'महाराणा कुंभा अवार्ड' अर राजस्थान रत्नाकर कानी सू राजस्थानी पुरस्कार मिळ चुक्या है। इणां रै टाळ ई केई इनाम-इकराम। बरस 2014 में राजस्थानी भाषा, साहित्य एवं संस्कृति अकादमी, बीकानेर कानी सू आपरै व्यक्तित्व अर कृतित्व माथै मोनोग्राम छप्यौ।

पाठ परिचै

'सवाल शुद्धता रौ' व्यंग्य रचना आज रै आपा-धापी रै जुग में मिलावट माथै चोट करै। इणमें धणी-लुगाई रै पात्रां रै माध्यम सू दूध री शुद्धता नै लेयनै सामाजिक विसंगति रौ सांगोपांग व्यंग्यात्मक चित्राम उकेरण री कोसीस करीजी है। मिलावट री इण दुनिया में सामाजिक संबंध ई प्रभावित होवै है, इण कानी भी आ व्यंग्य-रचना इसारौ करै। लेखक व्यंग्य रै सायरै सामाजिक तानै-बानै रै सागै मिनख मांय पसरती खोट अर उणरौ सामाजिक अर मनोवैग्यानिक असर घणै सांगोपांग ढंग सू बतायौ है। पुराणा अखाणां नै उघाड़ता साच सू परिचै करावै। पाठक रै मन में जथारथ रौ चानणौ करै। आज रै जुग री सब सू मोटी समस्या मिलावट अर गिरावट है। इण रा दरसन हर ठौड़ निगै आवै। आलंकारिक भासा अर मुहावरैदार सैली घणी असरदार है। 'सवाल शुद्धता रा' रौ साचाणी आज रै जुग री मोटी अबखायी अर अबखौ सवाल ई है। हवा में भांग घुळण रौ कैयनै लेखक मिलावट रौ फैलाव अर प्रभाव बतावण री कोसिस करी है। व्यंग्य, हास्य, रोचकता आद विसेसतावां नै अंगेजतौ औ व्यंग्य मिनख री सोच रौ साचौ चित्राम है।

सवाल शुद्धता रौ

आपां रै देस में दूध, दही रौ तोड़ौ नीं तौ पैलां कदैई रैयौ अर नीं आज है। जिका लोग दूध-दही रौ रोवणौ रोवै वै या तौ देस में हुयी श्वेत-क्रांति सूं अणजाण है या निहित स्वारथां सूं घिर्योड़ा है।

रैयी बात शुद्ध दूध री। शुद्ध दही तौ आपै ई मिळ जासी जे दूध शुद्ध होसी। जावण में कोई कितीक मिळावट करसी। सेंग रोळौ इण दूध री शुद्धता रौ इज तौ है। शुद्धता अेक भरम है। आ बदळती रैवै है। अबै पैलां जिस्यौ शुद्ध सोनौ ई नीं रैयौ तौ दूध-दही री कांई बात ? आ तौ अपणी-अपणी समझ री बात है कै कोई शुद्धता रै मामलै में नब्बै प्रतिशत सूं नीचै समझौतौ ई नीं करणौ चावै तौ कोई पचास-पिचपन सूं ही काम सरा लेवै। आ बात तौ खराखरी है कै सौ प्रतिशत शुद्धता खाली विग्यापनां में इज देखी-सुणी जा सकै है।

विस्वास करावौ। म्हनै तथ्यां नें तोड़-मरोड़नै परूसवा रौ शौक कदैई नीं रैयौ। आप चावौ तौ इतिहास-पुराणां सूं प्रमाण दिया जा सकै। अबै इणी बात नें इज लोग कैवै है कै पुराणै जमाने में घी-दूध री नदियां बँवती ही। आप ई सोचौ कै जे नदियां में घी-दूध बँवतौ हौ तौ उणमें पाणी नीं मिळतौ हौ कांई ? आ तौ हौ नीं सकै कै पैलां शक्तिशाली पम्प-सेटां री मदद सूं सगळा नदी-नाळा खाली करीजग्या व्हेला अर पछै उणां में घी-दूधां रा टँकर खाली कीधा व्हेला। छनीक देर रै वास्तै आ बात मान भी लेवां तौ महताऊ सवाल औ उठै है कै नदी-नाळां सूं खाली कीधोड़ौ पाणी अेक दिन में तौ भाप बणनै आभै चढवा सूं रैयौ। अबै कठै रैयी शुद्धता री बात ? वौ पाणी भूमिगत जळ रै रूप में पाछौ नदियां-नाळां में बँवतै दूध-दही-घी में बावड़ियौ इज होसी ! म्हँ इण सारू इज बजुर्गा नें वीणती करूं हूं कै पल-पल में पुराणै जमाने री घी-दूध री नदियां रौ नांव लेयनै नूवी पीढी में हीण-भावना मत भरौ। उणरौ मनोबळ मत गिरावौ। इण सूं म्हारी आतमा नें घोर संताप पूगै है अर म्हँ सोचूं कै म्हँ इण जमाने में पैदा क्यूं व्हियौ ?

घी-दूध री नदियां बहावण री बतां करणियां आ ई भूल जावै कै जे सगळी नदियां में घी-दूध ई बँवतौ हौ तौ बापड़ौ जळ कठै बँवतौ ? कांई खेती-बाड़ी में सिंचाई भी घी-दूध सूं इज होया करती ही। लोग सिनान ई घी-दूध सूं ई करता होवैला वां दिनां में ? प्राचीन काळ रा रिसी-मुनियां री दिनचर्या तौ सिनान सूं इज सरू व्हेती ही। जे जळ नीं हौ तौ वै क्रियां काम चलावता होसी ? अै जबरा सवाल है, जिणरा उथळा दीधां बिना घी-दूध री नदियां बैय नीं सकै।

पुराणै जमाने में राजा जिकी गायां दान में दिया करतौ हौ, वांरा सींगड़ा सोना सूं मंडावतौ। सवाल औ है कै शुद्ध दूध अर स्वर्ण में कांई संबंध है ? जे गाय रौ दूध महताऊ हौ तौ सोना सूं सींगड़ा मंडावण री कांई जरूत ही ?

म्हँ कैवणौ औ चावूं हूं कै मिळावट दूध में नीं, दूध रा विचार में आदकाळ सूं आज तांई होवती रैयी है अर आगै भी होसी। औ अेक मनोवैग्यानिक साच है कै ज्यू-ज्यू मिळावट बधसी, त्यू-त्यू ई शुद्धता रौ आग्रह ई बधतौ रैसी।

शुद्धता रौ आग्रह अेक निजू मामलौ है। इणमें नेम-कानून आडा नीं आ सकै। म्हँ आपनै घरबीती इज अरज करूं तौ सायद बात खुलासा व्हे जासी। म्हारी होवा वाळी लुगाई फेरां रै समै इज आ सरत राख दी ही कै म्हँ उणरै सारू दूजी भलाई कोई सुख-सुविधा जुटा सकूं कै नीं जुटा सकूं, कोई चिंता नीं, पण शुद्ध दूध री जुगाड़ म्हँ आजीवण करणी पड़सी। म्हारी मत मारी गी ही कै उण घड़ी म्हँ आ सरत भोत मामूली-सी लागी अर म्हँ नाड़ हिलायनै मंजूर कर लीधी। म्हँ कांई ठा ही कै इण घड़ी नाड़ हिलावणौ कितरौ मूँघौ पड़सी। साथै ई म्हँ इण बात रौ गुमेज ई होयौ कै म्हारी लुगाई कितरी शुद्धतावादी महिला है।

म्हँ म्हारा यार-दोस्तां नें घणै गरब सूं कैवतौ, “यार, थारी भाभी बिचारी कितरी सीधी-सादी है। बंगलौ, कार, फ्रीज, रंगीन टीवी जिसी किणी सुविधा री फरमाइस नीं करनै फकत दो किलौ शुद्ध दूध हमेस लावा री

फरमाइस कीधी है।” अनुभवी भायला म्हारी बात सुणनै ‘नो कमेंट्स’ री मुद्रा धास्यां मंद-मंद मुळकता रैवता। म्हनै वां दिनां उण मित्रां माथै रीस ई आवती। म्हें मन ई मन सोचतौ कै औ लोग भावात्मक दीठ सूं कितरा कृपण है कै म्हारी लुगाई रै त्याग अर सादगी री सरावणा में दो सबद ई नीं कैय रैया है। पण बाद में जद असलियत साम्हीं आयी तौ म्हें खुद री अनुभवहीणता माथै मन मसोसनै रैयग्यौ।

होयौ इयां कै ज्यू ई वा आणै आई, म्हारै दुरभाग रा दिन सरू व्हैग्या। दूजै ई दिन दूधवाळा री छुट्टी कर दीधी। घरवाळी री पारखी आंख्यां उण दूध में मिळ्योडै पचास प्रतिशत पाणी नैं अक दिन में इज देख लियौ अर म्हें इणीज दूध नैं खालस समझनै लारलै पांच बरस सूं सेवन कर रैयौ हौ। म्हें समझावण री कोसीस कीधी, “भागवान! औ स्हैर है। भागजोग सूं आपणौ दूधवाळौ सतगुणी है, जकौ आधौ पाणी ई मिळा रैयौ है। औ तीन चौथाई भी मिळाय देवै तौ ई लोग उण तरल पदारथ नैं दूध इज कैवैला अर दूध लावणिया नैं दूधवाळौ कैयनै इज हेलौ पाडैला।”

म्हारौ तरक तौ बोदौ नीं हौ, पण ठा नीं क्यूं, घरवाळी भूडै ढाळै बिफरगी अर अगन री साखी में खायी सौगन री याद दिरायदी। वा बोली, “देखौ, फेरां री वेळा थे आ प्रतिग्या करी ही कै शुद्ध दूध रौ बंदोबस्त करोला। जे नीं कर सकौ तौ कोई हरज कोनी। म्हनै म्हारै पीवर भिजाय देवौ। बटै घणौ ई धीणौ है। म्हनै म्हारा मायत इस्यौ दूध पीवा सारू थोडै ई उछेरी है। म्हनै आज सिंझ्या रा ई भेज दौ।”

आप समझ सकौ हौ कै अक नूवी परण्योड़ी पैल आणै आयोड़ी कामण रौ इस्यौ ‘अल्टीमेटम’ मरद री मरजाद नैं जड़ामूळ सूं हिलायनै रख दिया करै है। उण दिन सूं म्हारै चैन-आराम रौ पत्तौ कटग्यौ। दो दिन रै सोध-सर्वेक्षण रै बाद घरवाळी जकौ फरमान जारी कस्यौ कै काल सूं इज दूध ‘आदर्श डेयरी’ सूं आसी। फरमान रै सागै ई डेयरी री कूपन-बुक थमायनै बोली, “सुबै छह बज्यां पूग जाज्यौ दूध लेवण नैं। कैतली साफ करनै परेंडै धरदी है।”

म्हें आठ बजी ताई सोवण वाळौ। छह बज्यां डेयरी पूगण रौ फरमान सुणनै कांपग्यौ। पण होणी नैं कुण टाळ सकै?

फरमान जारी कीधां पछै ई श्रीमती जी नचीत नीं व्है सकी। घड़ी में पांच बज्यां रौ अलारम भर दियौ अर बोली, “अलारम बाजतां ई उठ रै तयार व्हैज्यौ। कोई आधीक घंटौ तौ तयार होवा में ई लागसी। आधीक घंटौ पूगण में अर लाइन में लागवा में। जद कठैई शुद्ध दूध रा दरसण होसी।”

अलारम टैम माथै बाजणौ इज हौ। वौ बाज्यौ। पण उठणौ तौ म्हारै हाथ हौ। म्हें नीं उठ्यौ। वा उठगी। थोड़ी देर म्हनै देखती रैयी कै म्हारौ कर्तव्यबोध जागै! पण म्हें नीं उठ्यौ तौ वा समझगी कै म्हारौ कर्तव्य म्हारै सूं ई ज्यादा निद्राप्रेमी है। बस, फेर काई हौ? अक झटकै सूं रजाई खेंचनै सिंघणी री तरै दहाड़ी, “अेऽऽजी, सुणौ कै नीं? दूध नीं लावणौ काई?”

औ अक सबद ‘अेऽऽजी’ इतरौ पावरफुल व्हेला, म्हें कदैई कल्पना भी नीं कीधी ही। जाणै कठां सूं म्हारै नींदाळू डील में गजब री फुरती बावड़गी। म्हें उठ्यौ अर चपलां पैरतौ बोल्यौ, “केतली कठै?”

केतली आई। डेयरी सूं दूध भी आयौ। सागै ई आयग्यौ जुकाम। चार दिन री सी.अेल.। डेढ-दो सौ रुपिया दवा-दारू में। म्हें सोची, अब तौ सायद छुट्टी मिळ जासी डेयरी-जातरा सूं। पण छुट्टी म्हारै भाग में कठै? हां, थोड़ी रियायत मिळगी। संशोधित फरमान जारी होयौ— “छह बज्यां री जगां सात बज्यां डेयरी पूगौ अर दूजी खेप सूं दूध लावौ।”

म्हें संशोधित आदेश रौ पालन सरू कर दियौ। पण नंबर दो री खेप रौ दूध घरवाळी री पारखी आंख्यां में नंबर दो री कमाई ज्यूं अखरवा लागौ अर अक दिन घोसणा होई— “शुद्ध दूध रै खातर गाय राखांला। न डेयरी जावण

रौ झंझट अर न शुद्धता रौ संकट ! घर री गाय व्हे तौ दूध ई मन माफिक वापरौ। पीयौ अर पावौ। बच जावै तौ जावण न्हाख दौ। छाछ फेरौ। घी काढौ। जांका घरे दोझा वांका घर सोझा।” घरवाळीजी घर री गाय रा गुणानुवाद अेक सांस में इण तरै करगी जिण तरै विग्यान रौ कोई छात्र फार्मूलौ बोल जावै अर अणमणियौ उणरै मूँछां कानी टक-टक न्हाळतौ रह जावै।

घरवाळी जी आपरै पिताश्री नैं संदेसौ भेज दियौ। पांचवैं दिन गाय हाजर। सागै ई ग्वाळ भी हाजर। बारह-तेरह बरस रौ अेक छोरौ। घरवाळी रै दूर रै रिस्तै में भतीजौ।

इण नूवी व्यूह रचना नैं देखनै म्हनैं भावी विपत्ति रौ अनुमान व्हेतां देर नैं लागी। पण कर्यौ काई जा सकै। जे म्हैं लगन मंडप में इज अै सगळी बातां सोच लेवतौ तौ कितरौ चोखौ होवतौ ? घरवाळी सायद म्हारी मनस्थिति भांपगी। बोली, “गाय किसीक लागी ? ठीक है नीं ? न घणी मोटी, न छोटी। पूळै भूखी अर पूळै धापी। घर में गाय राखणौ सास्त्रां में ई पुत्र रौ काम बखाणीज्यौ है। दिनुगै-दिनुगै ई गोमाता रा दरसण। धन्न भाग ! म्हैं थानै कैवू हूं कै थे रोज गोमाता रा सगुन लेयनै दफ्तर पधारज्यौ। थारी रुक्योड़ी तरक्की छह महीनै में नैं मिळ जावै तौ म्हनैं कैईज्यौ।” कुसळ ज्योतसी री तरै घरवाळी म्हनैं सब्जबाग दिखा दिया। थोड़ीक ठैरनै बोली, “औ गोपाळ है नीं, इणनैं तौ म्हैं खुद ई पांच-सात दिन में पाछौ गांव खिणा द्यूंला। बस, यू समझौ कै गाय जमी, अर गोपाळ गयौ।”

जिण छत रै तळै दो प्राणी हा अचाणचक चार व्हेग्या। घरवाळी जी रौ बेसी टैम गो-गोपाळ सेवा में बीतबा लागौ। म्हारौ लिखणौ-पढणौ छूटग्यौ। आज गाय रै बांटौ लाणौ, आज कुट्टी लाणी, आज रजकै री बंधी बांधणी, आज गाय मांदी पड़गी। जिनावरां रै सफाखानै ले जावणी। चौमासौ छाती चढ्यौ तौ गाय रै टाप घालणी।

घर में पग मेलतां ई नित नूवौ आदेस। आज गाय रै खातर औ करणौ, आज वौ करणौ। दो किलो शुद्ध दूध माथै जिनगाणी री सगळी खुसियां निछावर व्हेगी। नचींताई कपूर ज्यू उडगी। म्हैं बेबस हौ।

थोड़ा दिनां पछै घरवाळी कैयौ, “देखौ, थे तौ दफ्तर चल्या जावौ। मीटिंगां-फीटिंगां में बारै भी जावता ई रैवौ। सिंझ्या रा घरां भी मोड़ा ई आवौ। म्हैं इतरै बड़े बंगलै में घबराऊं अेली। नीं व्हे तौ इयां करां कै इण गोपाळ नैं अठै ही राखलां। म्हारै भी बसती रैसी अर छोटा-मोटा काम भी सलटा देसी औ। स्कूल में भरती करा देवांला। विद्यादान रौ पुत्र भी मिलसी थानै अर टाबर री जिंदगी बण जासी स्हैर में रैवा सूं।”

दान-पुत्र रा मामला में म्हैं म्हारै ससुराजी रै लारै कीकर रैवतौ ? पैलां वां कन्यादान अर पछै ‘गोदान’ रौ पुत्र कीधौ तौ म्हनैं ‘विद्यादान’ रौ करणौ ई हौ।

पांच-छह महीनां पछै गाय डाकगी। म्हैं सोची कै कठैई घरवाळी पीहर सूं दूजी गाय मंगायनै डेयरी नैं खोलदै। पण म्हारी संका निरमूळ ही। घरवाळी बोली, “गाय डाकगी है।”

म्हैं कैयौ, “कोई बात कोनी। डेयरी सूं बंधी कर लेस्यां। अबै तौ गोपाळ है इज। लेय आया करसी।”

पण घरवाळी आपरै पीहर रै किणी प्राणी नैं कष्ट देवण रै पख में नीं ही। वा बोली, “नीं रैवा दौ। डेयरी वाळा ई किस्यौ घी घालै है ? मिनख री नीत में इज मिलावट बापरगी है। थे तो इयां करौ कै उणीज पुराणै दूधवाळै सूं बंधी बांध दौ। थोड़ा दिनां री ई तौ बात है। फेर तौ गाय ब्याय ई जासी।”

अेक बरस रै विवाहित जीवन में सायद पैली बार श्रीमतीजी रा मुखारविंद सूं इमरत जिसी वाणी सुणनै म्हैं अेडी सूं चोटी ताई पुलकित होयां बिना नीं रैय सक्यौ। म्हैं तुरता-फुरती साइकिल उठायनै पुराणा दूधवाळै सूं दूध री बंधी बांधवा निकळ पड़्यौ। म्हनैं संकौ हौ कै कठैई घरवाळी फेर कोई संशोधित आदेश जारी नीं कर देवै।

अबखा सबदां रा अरथ

तोड़ौ=कमी, अभाव। छनीक=छिन भर, पल भर। गुमेज=अंजस, गौरव। दीठ=दृष्टि। आणै आई=पैली वळा सासरे आयी। बोदौ=पुराणौ, जूनौ। उछेरी=टोरी, भेजी। परेंडौ=पाणी रौ पळीं डौ, मटकी राखण री ठौड़। डील=सरीर। दोझा=जिण घर में धीणौ होवै। न्हाळतौ=देखतौ, ढूँढतौ। खिणा द्यूंला=भेज देवूला। डाकगी=टळगी, दूध देवणौ बंद कर दियौ। इमरत=अमृत।

सवाल

विकळपाऊ पडूत्तर वाळा सवाल

- लेखक री घरवाळी फेरा सूं पैली काई सरत राखी ?
 (अ) शुद्ध दूध री वैवस्था (ब) शुद्ध पाणी री वैवस्था
 (स) शुद्ध घी री वैवस्था (द) शुद्ध वातावरण
 ()
- लेखक री घरवाळी शुद्ध दूध लावण री पैलपोत वैवस्था काई करी ही ?
 (अ) डेयरी सूं दूध लावणौ (ब) दूधवाळौ बदळ दियौ
 (स) गाय खरीदली (द) चौहटै सूं दूध लावण री
 ()
- लेखक री घरवाळी डेयरी सूं दूध लावण री पैलपोत वैवस्था किणनैं संपी ही ?
 (अ) खुद नैं (ब) गोपाळ नैं
 (स) धणी नैं (द) घरै पूगावण वाळा नैं
 ()
- पुराणै जमानै में राजा-महाराजा किण रौ दान करता हा ?
 (अ) गऊदान (ब) जमीं रौ दान
 (स) सोनै रौ दान (द) मोहरां रौ दान
 ()

साव छोटा पडूत्तर वाळा सवाल

- लेखक री लुगाई शुद्ध दूध सारू छेवट काई वैवस्था करी ?
- घी दूध री नदियां किण देस में बैवती ही ?
- लेखक नैं किण बात रौ गरब होयौ ?
- लेखक जद छह बज्यां उठनै डेयरी सूं दूध नीं ला सक्यौ तौ दूजौ काई उपाय करीज्यौ ?
- गाय रै टळ्यां पछै दूध री पाछी काई वैवस्था करीजी ?

छोटा पडूत्तर वाळा सवाल

- “ज्यूं-ज्यूं मिळावट बधसी, त्यूं-त्यूं ई शुद्धता रौ आग्रह भी बधतौ रैसी।” इण बात नैं समझायनै लिखौ।
- “जांका घरै दोझा वांका घर सोझा।” इणरौ अरथ समझावता थकां इणमें छप्योड़ै व्यंग्य रौ खुलासौ करौ।

3. घर में गाय आवण सूं लेखक रौ काम कीकर बधग्यौ ?
4. लेखक री लुगाई आपरै भतीजै गोपाळ नैं स्थायी रूप सूं आपरै अठै राखण सारू काई बहानौ बणायौ ?

लेखरूप पड़ुत्तर वाळा सवाल

1. 'सवाल शुद्धता रौ' व्यंग्य रचना री भासा-सैली री विसेसतावां उजागर करौ।
2. "आज तौ हवा मांय भांग घुळगी है।" इण दीठ सूं मिळावट री समस्या री चरचा करता थकां इणनैं मेटण सारू आपरा सुझाव दिरावौ।
3. आज रै सामाजिक विसंगति रै परिपेख में इण व्यंग्य री महत्ता उजागर करौ।
4. "मिनख री नीति में इज मिळावट वापरगी है।" इण कथन रौ खुलासौ करता थकां समाज में फैल्योड़ी इण बुराई नैं रेखांकित करौ।

नीचै दिरीज्या गद्यांसां री प्रसंगाऊ व्याख्या करौ।

1. अबै इणी बात नैं इज लोग कैवै है कै पुराणै जमानै में घी-दूध री नदियां बँवती ही। आप ई सोचौ कै जे नदियां में घी-दूध बँवतौ हौ तौ उणमें पाणी नीं मिळतौ हौ काई ? आ तौ हौ नीं सकै कै पैलां शक्तिशाली पम्प-सेटां री मदद सूं सगळ नदी-नाळा खाली करीजग्या व्हेला अर पछै उणां में घी-दूधां रा टँकर खाली कीधा व्हेला।
2. घी-दूध री नदियां बहावण री बातां करणियां आ ई भूल जावै कै जे सगळी नदियां में घी-दूध ई बँवतौ हौ तौ बापड़ौ जळ कठै बँवतौ ? काई खेती-बाड़ी में सिंचाई भी घी-दूध सूं इज होया करती ही। लोग सिनान ई घी-दूध सूं ई करता होवैला वां दिनां में ?
3. केतली आई। डेयरी सूं दूध भी आयौ। सागै ई आयग्यौ जुकाम। चार दिन री सी.अेल.। डेढ-दो सौ रुपिया दवा-दारू में। म्हैं सोची, अब तौ सायद छुट्टी मिळ जासी डेयरी-जातरा सूं। पण छुट्टी म्हारै भाग में कठै ? हां, थोड़ी रियायत मिळगी। संशोधित फरमान जारी होयौ— "छह बज्यां री जगां सात बज्यां डेयरी पूगौ अर दूजी खेप सूं दूध लावौ।"
4. पण घरवाळी आपरै पीहर रै किणी प्राणी नैं कष्ट देवण रै पख में नीं ही। वा बोली, "नीं रैवा दौ। डेयरी वाळा ई किस्यौ घी घालै है ? मिनख री नीत में इज मिलावट बापरगी है। थे तो इयां करौ कै उणीज पुराणै दूधवाळै सूं बंधी बांध दौ। थोड़ा दिनां री ई तौ बात है। फेर तौ गाय ब्याय ई जासी।"